



Broj/ Број : 02/2-50-1-13-20/08  
Sarajevo/ Сарајево: 9.12.2008.godine

## **ZAPISNIK**

### **20. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine, održane 3.12.2008.**

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Rudo Vidović, Adem Ibrahimpašić, Branko Zrno i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji. Odsustvo je opravdala Dušanka Majkić.

Sjednici su, u svojstvu predlagača i izvjestilaca, prisustvovali: Miroljub Krunić, pomoćnik ministra finansija i trezora BiH, Kojo Koprivica i Željko Knežević, pomoćnici ministra komunikacija i prometa BiH, Midhat Salić, šef Odsjeka u Ministarstvu vanjske trgovine i ekonomskih odnosa BiH, Sanja Kenig-Ćorović, šef Odsjeka za UN i ostale međunarodne organizacije, Rabija Mašić, savjetnik u Odsjeku za susjedne zemlje, i Elma Bačvić, savjetnik u Odsjeku za Evropsku uniju i Vijeće Evrope u Ministarstvu vanjskih poslova BiH, Helena Tavra, stručni savjetnik u Ministarstvu pravde BiH, i Zoran Brkić, viši stručni saradnik u Sektoru za odnose s javnošću PSBiH.

Sjednica Komisije počela je u 13 sati.

Predsjedavajuća Komisije Alma Čolo konstatirala je da postoji kvorum potreban za rad i odlučivanje i za sjednicu predložila sljedeći

## **DNEVNI RED**

1. Usvajanje Zapisnika 19. sjednice Komisije;
2. Razmatranje Prijedloga zakona o dopuni Zakona o Javnom radiotelevizijskom sistemu BiH (prva komisijska faza), predlagač: Vijeće ministara BiH;
3. Davanje saglasnosti za ratifikaciju Ugovora o finansiranju između Bosne i Hercegovine i Federacije BiH i Evropske investicione banke – Projekat vodovoda i kanalizacije u Federaciji BiH;

4. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austrija Creditanstalt AG – Projekata izgradnje vodovoda Fojnica-Kiseljak i kanizacionog kolektora Lepenica–Kiseljak;
5. Davanje saglasnosti za ratifikaciju Evropskog sporazuma o dostavljanju molbi za pravnu pomoć, Strazbur, 27. januara 1977.;
6. Davanje saglasnosti za ratifikaciju Sporazuma između Bosne i Hercegovine i Vijeća ministara Republike Albanije o recipročnom unapređenju i zaštiti investicija;
7. Razmatranje informacija i izvještaja Ministarstva vanjskih poslova BiH:
  - Informacija o rezolucijama Evropskog parlamenta o Bosni i Hercegovini a u vezi s ratificiranjem Sporazuma o stabilizaciji i pridruživanju;
  - Informacija o zaključcima Vijeća Evropske unije o Bosni i Hercegovini;
  - Informacija sa 63. zasjedanja Generalne skupštine Ujedinjenih naroda, Njujork, od 22.do 29. septembra 2008.;
  - Izvještaj o zvaničnoj posjeti predsjednika Republike Slovenije dr. Danila Türka Bosni i Hercegovini, 13. i 14. oktobra 2008.;
8. Razmatranje izvještaja o međunarodnim aktivnostima parlamentarnih delegacija PSBiH:
  - Izvještaj stalne delegacije Parlamentarne skupštine BiH sa četvrtog dijela redovnog zasjedanja Parlamentarne skupštine Vijeća Evrope, Strazbur, od 29. septembra do 3. oktobra 2008.;
  - Izvještaj Interparlamentarne grupe BiH pri Interparlamentarnoj uniji o zasjedanju parlamentarne konferencije WTO-a, održane u Ženevi, 11. i 12. septembra 2008.;
  - Izvještaj sa 119. zasjedanja Skupštine Interparlamentarne unije, Ženeva, od 13. do 15. oktobra 2008.;
  - Izvještaj sa sastanka Općeg komiteta za kulturu Parlamentarne skupštine Centralnoevropske inicijative, Beč, 25. i 26. septembra 2008.;
  - Izvještaj s jesenjih sastanaka Parlamentarne skupštine OSCE-a, održanih u Torontu od 17. do 21. septembra 2008.;
  - Izvještaj s regionalnog parlamentarnog sastanka „Jačanje institucionalnog okvira parlamentarne saradnje u Jugoistočnoj Evropi“, Kišinjev, Moldavija, 30. i 31. oktobra 2008.;
9. Upoznavanje s dopisom Regulatorne agencije za komunikacije BiH upućenom Vijeću ministara BiH o preduzimanju mjera za osiguranje nesmetanog razvoja tržišta komunikacija;
10. Tekuća pitanja:
  - Dogovor o održavanju sjednice Komisije na kojoj će biti razmatrana aktuelna situacija u BHRT-u.

*Predloženi dnevni red usvojen je jednoglasno.*

#### **Ad.1. Usvajanje Zapisnika 19. sjednice Komisije**

*Zapisnik je usvojen jednoglasno.*

#### **Ad. 2. Razmatranje Prijedloga zakona o dopuni Zakona o Javnom radiotelevizijskom sistemu BiH (prva komisijska faza), predlagач: Vijeće ministara BiH;**

Predsjedavajuća Komisije Alma Čolo podsjetila je da je Prijedlog zakona u parlamentarnu proceduru dostavilo Vijeće ministara BiH, 20.11.2008., uz traženje da se razmatra po osnovnom zakonodavnom postupku. Dodala je da je nadležna komisija Predstavničkog doma na sjednici održanoj 26.11.2008. podržala principe Prijedloga zakona te prihvatila zaključak da se od Predstavničkog doma zatraži da se, zbog činjenice da se radi o jednostavnom zakonskom prijedlogu

(dodaje se praktično samo jedan član) kao i zbog sadržaja (odnosi se na oslobađanje od plaćanja RTV takse za slijepa lica), nakon usvajanja Prijedloga zakona u prvom čitanju, odmah na istoj sjednici Doma razmatra i u drugom čitanju, tj. bez razmatranja u drugoj fazi u nadležnoj komisiji. Predložila je da uvodno obrazloženje o Prijedlogu zakona podnesu prisutni predstavnici Vijeća ministara BiH, odnosno nadležnog ministarstva.

Uvodno izlaganje o Prijedlogu zakona iznio je Kojo Koprivica, pomoćnik ministra komunikacija i prometa BiH. Istakao je da se Prijedlogom zakona predlaže da se iza člana 17. Zakona o Javnom radiotelevizijskom sistemu BiH dodaje novi član 17.a kojim se predviđa da se od obaveze plaćanja RTV takse oslobađaju domaćinstva-vlasnici prijemnika čiji je najmanje jedan član lice koje je trajno izgubilo vid. Ovo pravo ostvarivalo bi se na osnovu potvrde ustanove nadležne za poslove penzionog i invalidskog osiguranja. Inicijativu za donošenje ovog zakona pokrenulo je Udruženje slijepih BiH. Ministarstvo komunikacija i prometa BiH, kao nadležno ministarstvo, pokrenulo je proceduru izrade Prijedloga zakona, tokom koje su konsultirani i svi javni emiteri u BiH, koji su iznijeli svoje protivljenje donošenju jednog takvog zakona. Njihova ključna primjedba bila je da se RTV taksa plaća kao posebna vrsta poreza na posjedovanje radio ili TV aparata. Ministarstvo je bilo u dilemi da li nastaviti rad na izradi i donošenju zakona i uputiti Prijedlog zakona u parlamentarnu proceduru ili ne. Ministarstvo se ipak opredijelilo, najviše iz humanih razloga, da se Prijedlog zakona uputi u daljnju proceduru a pri tome se rukovalo sličnom ili identičnom praksom u susjednim zemljama (Srbija i Hrvatska), kao i procjenom da to ne bi značajnije umanjilo prihode javnih emitera. Naime, prema podacima Udruženja slijepih, ukupan broj lica koja bi bila oslobođena plaćanja RTV takse bio bi oko pet hiljada. Pod pretpostavkom da svi oni imaju TV aparat, odnosno da već plaćaju RTV taksu to bi, pri sadašnjem iznosu RTV takse od 6,70 KM, značilo manji mjesečni prihod od oko 33.000 KM. Istina, u nekim zemljama ova lica nisu oslobođena plaćanja ovakve obaveze, ali u tim slučajevima države osiguravaju dodatne subvencije za njih.

Željko Knežević, također pomoćnik ministra komunikacija i prometa BiH, dodao je da je Nikola Špirić primio delegaciju Udruženja slijepih na nivou BiH i tom prilikom obećao da će se lično založiti da se ovakav zakon donese.

Predsjedavajuća Komisije podsjetila je na dopis Upravnog odbora Javnog RTV sistema BiH koji je dostavljen Parlamentarnoj skupštini BiH u međuvremenu, tj. nakon što je Vijeće ministara BiH dostavilo Prijedlog zakona. Istakla je da se u ovom dopisu Upravni odbor protivi donošenju ovog zakona, odnosno oslobađanju slijepih lica od plaćanja RTV takse. Naročito je ukazala na boldirani dio teksta dopisa Upravnog odbora u kojem je navedeno da bi donošenje ovog zakona bilo u suprotnosti s odredbama člana 17. Zakona o Javnom radiotelevizijskom sistemu BiH, kojim je predviđeno da je „svako domaćinstvo i pravno lice, koje posjeduje radio i televizijski prijemnik, dužno plaćati mjesečnu taksu za posjedovanje tog prijemnika“. Umjesto oslobađanja za slijepa lica predlažu da se „status pojedinih kategorija invalidnih lica treba rješavati u skladu s važećim međunarodnim standardima, gdje se obaveza plaćanja takse za pojedine kategorije domaćinstava nadoknađuje iz budžeta i socijalnih fondova“. Istakla je da ona ne smatra da bi novi član koji se predlaže ovim zakonom bio u suprotnosti s postojećim članom 17. Predložila je da Komisija na današnjoj sjednici podrži principe Zakona, ali da ne postupi kao nadležna komisija Predstavničkog doma, odnosno da ne predloži da se Zakon odmah na sjednici doma razmatra i u drugom čitanju. Naravno, i pored toga, Dom može odlučiti na samoj sjednici da Prijedlog zakona odmah razmatra i u drugom čitanju.

Adem Ibrahimpašić istakao je da donošenje ovog zakona, odnosno oslobađanje slijepih lica od plaćanja RTV takse ne može biti problem, nego da je mnogo ozbiljniji problem za Javni RTV sistem to što više od 1/3 države ne plaća RTV taksu uopće.

Slobodan Šaraba osvrnuo se na činjenicu da je inicijativa za izradu zakona potekla nakon sastanka Udruženja slijepih s predsjedavajućim Vijeća ministara BiH Nikolom Špirićem. Postavio je pitanje šta bi se desilo kada bi i druga slična udruženja posjetila predsjedavajućeg Vijeća ministara BiH. Vjerovatno bi tada obim ovog zakona bio znatno veći ili bi imali i više ovakvih i sličnih zakona. Dodao je da se ne protivi donošenju ovog zakona, ali smatra da bi bilo mnogo bolje kada bi i sva druga lica za koja postoji određeni osnov za to, bila obuhvaćena oslobađanjem od plaćanja RTV takse.

Rudo Vidović istakao je da podržava principe Prijedloga zakona u prvom čitanju, ali isto tako smatra da se o ovome još treba razgovarati. Dodao je da određeni problem za funkcioniranje Javnog RTV sistema predstavlja i to što baze podataka o pretplatnicima vode telekomu, a uvidom u te baze podataka moglo bi se vidjeti da li ima i koliko i drugih kategorija koje imaju osnov za oslobađanje.

Branko Zrno istakao je da podržava Prijedlog zakona, ali je dodao da se po ko zna koji put Parlamentarna skupština BiH dovodi u moralnu i pravnu dilemu. Nedostaje socijalna karta u BiH i ovakve situacije mogle bi se i trebale rješavati zakonima o socijalnim pravima. Može se podržati Prijedlog zakona mada se isto tako može podržati i Nikola Deretić, odnosno Upravni odbor Javnog RTV sistema BiH.

Predsjedavajuća Čolo također je konstatirala da je dostavljeno mišljenje Direkcije za evropske integracije BiH u kojem je istaknuto da je analizom sekundarnih izvora prava Evropske unije utvrđeno da materija koja se uređuje Prijedlogom zakona nije regulirana pravno obavezujućim aktima Evropske unije, odnosno da je predmet reguliranja nacionalnih pravnih propisa zemalja članica. Međutim, u mišljenju je konstatirano da „Evropska unija pridaje veliki značaj licima s posebnim potrebama, s naglaskom na otklanjanje barijera u ostvarivanju jednakih mogućnosti i punog učešća u svim aspektima života te eliminiranju njihove negativne diskriminacije“.

Nakon rasprave, u skladu s članom 98. stav (1) Poslovnika Doma naroda Parlamentarne skupštine Bosne i Hercegovine, *Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine jednoglasno je prihvatila principe Prijedloga zakona o dopuni Zakona o Javnom radiotelevizijskom sistemu BiH.*

### **Ad. 3. Davanje saglasnosti za ratifikaciju Ugovora o finansiranju između Bosne i Hercegovine i Federacije BiH i Evropske investicione banke – Projekat vodovoda i kanalizacije u Federaciji BiH**

Predsjedavajuća Komisije Alma Čolo podsjetila je da je Predstavnički dom već dao saglasnost za ratificiranje ovog međunarodnog ugovora na svojoj 40. sjednici, održanoj 19.11.2008., te konstatirala da je ugovor u nadležnosti Ministarstva finansija i trezora BiH.

Uvodno obrazloženje podnio je Miroljub Krunić, pomoćnik ministra finansija i trezora BiH. Istakao je da se radi o kreditu u iznosu od 60 miliona eura, namijenjenom za finansiranje potreba općinske vodovodne i kanalizacione infrastrukture u Federaciji BiH. Kredit se uzima na period od 25 godina, uz 6 godina grejs perioda. Kamatna stopa je tržišna (LIBOR). Projekat se odnosi na 14 općina u Federaciji BiH a moguće je da i druge općine naknadno budu uključene. Sve procedure u vezi s ugovorom provedene su u skladu s važećim zakonskim odredbama. *Nakon izlaganja predstavnika nadležnog ministarstva, članovi Komisije jednoglasno su odlučili da predlože Domu naroda davanje saglasnosti za ratifikaciju Ugovora o finansiranju između Bosne i Hercegovine i Federacije BiH i Evropske investicione banke – Projekat vodovoda i kanalizacije u Federaciji BiH.*

**Ad. 4. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austrija Creditanstalt AG – Projekata izgradnje vodovoda Fojnica-Kiseljak i kanalizacionog kolektora Lepenica–Kiseljak;**

Predsjedavajuća Komisije Alma Čolo konstatirala da je Predstavnički dom i za ovaj sporazum dao saglasnost za ratificiranje na svojoj 40. sjednici održanoj 19.11.2008., te da je Ministarstvo finansija i trezora BiH nadleženo i za ovaj sporazum.

Uvodno obrazloženje i za ovaj sporazum podnio je Miroljub Krunić, pomoćnik ministra finansija i trezora BiH. Istakao je da se radi o kreditu u iznosu od oko 5 miliona eura. Sporazum se naslanja na okvirni sporazum o finansijskoj saradnji između Republike Austrije i Bosne i Hercegovine. Nadležna banka je Banka Austrije. Kamatna stopa je 0%, ali postoje troškovi garancije 1,23% godišnje, troškovi upravljanja 0,45% i 0,30% za neiskorištena sredstva. Istakao je da je kredit veoma povoljan, nivo koncesionalnosti je preko 35%, period otplate 13,5 godina, uz grejs period 6 godina. *Nakon izlaganja predstavnika nadležnog ministarstva, članovi Komisije jednoglasno su odlučili da predlože Domu naroda davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austrija Creditanstalt AG – Projekata izgradnje vodovoda Fojnica-Kiseljak i kanalizacionog kolektora Lepenica–Kiseljak.*

**Ad. 5. Davanje saglasnosti za ratifikaciju Evropskog sporazuma o dostavljanju molbi za pravnu pomoć, Strazbur, 27. januar 1977.**

Prvo je predsjedavajuća Komisije podsjetila da je Predstavnički dom dao saglasnost za ratificiranje Evropskog sporazuma na 40. sjednici, održanoj 19.11.2008. Konstatirala je da je sporazum u nadležnosti Ministarstva pravde BiH i pozvala predstavnika nadležnog ministarstva da da kratko uvodno obrazloženje.

Uvodno obrazloženje o Sporazumu podnijela je Helena Tavra, stručni savjetnik u Ministarstvu pravde BiH. Istakla je da je od 1977. godine do sada ovaj sporazum ratificiralo 30 zemalja članica Vijeća Evrope. Ovim sporazumom otklanjaju se prepreke u građanskim postupcima i omogućava lakše ostvarivanje prava u građanskim stvarima licima slabijeg materijalnog statusa. Kao centralni organ za ovaj sporazum predviđeno je Ministarstvo pravde BiH. Sporazum neće zahtijevati izmjene ili donošenje novih propisa u Bosni i Hercegovini, niti će za provođenje Sporazuma biti potrebna dodatna finansijska sredstva.

Predsjedavajuća Čolo podsjetila je da je Bosna i Hercegovina kao članica Vijeća Evrope potpisala Evropsku konvenciju o uzajamnoj pravnoj pomoći i u krivičnim i u građanskim stvarima i dodala da je pravna pomoć nešto što je predmet svakodnevne saradnje naših pravosudnih organa. Nakon toga, *članovi Komisije jednoglasno su odlučili da predlože Domu naroda davanje saglasnosti za ratifikaciju Evropskog sporazuma o dostavljanju molbi za pravnu pomoć, Strazbur, 27. januar 1977.*

**Ad. 6. Davanje saglasnosti za ratifikaciju Sporazuma između Bosne i Hercegovine i Vijeća ministara Republike Albanije o recipročnom unapređenju i zaštiti investicija**

Predsjedavajuća Komisije Čolo konstatirala je da je Predstavnički dom već dao saglasnost za ratificiranje ovog međunarodnog sporazuma također na 40. sjednici, 19.11.2008. Konstatirala je da je Sporazum u nadležnosti Ministarstva vanjske trgovine i ekonomskih odnosa BiH.

Obrazloženje o sporazumu dao je Midhat Salić, šef Odsjeka u Ministarstvu vanjske trgovine i ekonomskih odnosa BiH. Naglasio je da se radi o tipskom sporazumu i još jednom u nizu sporazuma o zaštiti i unapređenju investicija. Sporazum predviđa tretman najpovlaštenije nacije i nacionalni tretman za investitore iz ugovornih strana. Sporazum je usaglašen s odredbama međunarodnog ugovornog prava kao i s principima Svjetske trgovinske organizacije. Nakon obrazloženja predstavnika nadležnog ministarstva, *članovi Komisije jednoglasno su odlučili da predlože Domu naroda davanje saglasnosti za ratifikaciju Sporazuma između Bosne i Hercegovine i Vijeća ministara Republike Albanije o recipročnom unapređenju i zaštiti investicija.*

#### **Ad. 7. Razmatranje informacija i izvještaja Ministarstva vanjskih poslova BiH:**

- **Informacija o rezolucijama Evropskog parlamenta o Bosni i Hercegovini a u vezi s ratificiranjem Sporazuma o stabilizaciji i pridruživanju;**
- **Informacija o zaključcima Vijeća Evropske unije o Bosni i Hercegovini;**
- **Informacija sa 63. zasjedanja Generalne skupštine Ujedinjenih naroda, Njujork, od 22.do 29. septembra 2008.;**
- **Izvještaj o zvaničnoj posjeti predsjednika Republike Slovenije dr. Danila Türka Bosni i Hercegovini, 13. i 14. oktobra 2008.**

Elma Bačvić, stručni savjetnik u Ministarstvu vanjskih poslova BiH, informirala je o rezolucijama Evropskog parlamenta o Bosni i Hercegovini a u vezi s ratificiranjem Sporazuma o stabilizaciji i pridruživanju, kao i o zaključcima Vijeća Evropske unije. Prvo je Evropski parlament, 23.10.2008., usvojio legislativnu rezoluciju kojom je i formalno odobren Sporazum o stabilizaciji i pridruživanju. Odluka je donesena u skladu s procedurom odobravanja koja je uvedena Jedinstvenim evropskim aktom iz 1986. godine i koja predviđa da Evropski parlament mora dati saglasnost na sve međunarodne ugovore i pregovore koje je vodila Evropska komisija. Potom je Doris Pak, kao izvjestilac Evropskog parlamenta za Bosnu i Hercegovinu, predložila rezoluciju o Bosni i Hercegovini koja je došla kao rezultat legislativne rezolucije a kojom se ukazuje na sve obaveze koje stoje pred BiH u procesu provođenja Sporazuma o stabilizaciji i pridruživanju kao i Privremenog sporazuma, poziva Parlamentarnu skupštinu BiH na blisku saradnju s entitetskim parlamentima na provođenju sporazuma i bržem donošenju zakona koji proizilaze iz provođenja Sporazuma o stabilizaciji i pridruživanju, te pozivaju sve zemlje članice Evropske unije da ubrzaju ratifikaciju SPP-a.

U vezi s Informacijom sa 63. zasjedanja Generalne skupštine Ujedinjenih naroda, Sanja Kenig-Ćorović, šef Odsjeka u Ministarstvu vanjskih poslova BiH, dala je dodatne informacije o nastojanju BiH da postane nestalna članica Vijeća sigurnosti UN-a. Istakla je da je to, uz sjevernoatlantske integracije, jedan od strateških ciljeva Bosne i Hercegovine. Poljska, koja je bila protukandidat Bosni i Hercegovini, povukla je svoju kandidaturu i pozvala sve zemlje koje su je podržavale da sada tu podršku daju Bosni i Hercegovini. Formirano je koordinaciono tijelo i izrađen akcioni plan za realizaciju ovog cilja.

U diskusiju se uključio Slobodan Šaraba i istakao da Informacija sa 63. zasjedanja Generalne skupštine UN-a taksativno prenosi šta se tamo dešavalo. Dodao je, međutim, da je izlaganje Harisa Silajdžića, u to vrijeme predsjedavajućeg Predsjedništva BiH, tokom zasjedanja Generalne skupštine Ujedinjenih naroda jako usložilo situaciju i doprinijelo dizanju tenzija u BiH. Istakao je da on ne može prihvatiti neke stvari koje je Silajdžić iznio u Ujedinjenim narodima, jer ih jednostavno smatra netačnim i predložio da se o izvještajima i informacijama izjašnjava pojedinačno, a ne u paketu.

Branko Zrno istakao je da se radi o dokumentima koje Komisija samo treba da primi k znanju i ne vidi potrebu za posebnim izjašnjanjima.

Sličan stav iznijela je i Alma Čolo, naglašavajući da Ministarstvo vanjskih poslova BiH dostavlja zvanične izvještaje i informacije o učešću delegacija Bosne i Hercegovine u međunarodnim aktivnostima a koje Komisija treba primiti k znanju, jer Komisija jednostavno ne može promijenti ono što je rečeno na tim međunarodnim skupovima ili šta se tamo dešavalo. Međutim, dodala je da razumije i uvažava stav Šarabe i predložila da se u zapisniku konstatira da je Šaraba, prilikom razmatranja Informacije sa 63. zasjedanja Generalne skupštine Ujedinjenih naroda, izrazio svoje neslaganje s uvodnim govorom i obraćanjem predsjedavajućeg Predsjedništva BiH Harisa Silajdžića pred Generalnom skupštinom Ujedinjenih naroda u Njujorku. *Ovaj prijedlog predsjedavajuće Komisije jednoglasno je prihvaćen a nakon toga članovi Komisije jednoglasno su primili k znanju:*

- *Informaciju o rezolucijama Evropskog parlamenta o Bosni i Hercegovini a u vezi s ratificiranjem Sporazuma o stabilizaciji i pridruživanju;*
- *Informaciju o zaključcima Vijeća Evropske unije o Bosni i Hercegovini;*
- *Informaciju sa 63. zasjedanja Generalne skupštine Ujedinjenih naroda, Njujork, od 22. do 29. septembra 2008.;*
- *Izveštaj o zvaničnoj posjeti predsjednika Republike Slovenije dr. Danila Türka Bosni i Hercegovini, 13. i 14. oktobra 2008.*

**Ad. 8. Razmatranje izvještaja o međunarodnim aktivnostima parlamentarnih delegacija PSBiH:**

- **Izveštaj stalne delegacije Parlamentarne skupštine BiH sa četvrtog dijela redovnog zasjedanja Parlamentarne skupštine Vijeća Evrope, Strazbur, od 29. septembra do 3. oktobra 2008.;**
- **Izveštaj Interparlamentarne grupe BiH pri Interparlamentarnoj uniji o zasjedanju parlamentarne konferencije WTO-a, održane u Ženevi, 11. i 12. septembra 2008.;**
- **Izveštaj sa 119. zasjedanja Skupštine Interparlamentarne unije, Ženeva, od 13. do 15. oktobra 2008.;**
- **Izveštaj sa sastanka Općeg komiteta za kulturu Parlamentarne skupštine Centralnoevropske inicijative, Beč, 25. i 26. septembra 2008.;**
- **Izveštaj s jesenjih sastanaka Parlamentarne skupštine OSCE-a, održanih u Torontu, od 17. do 21. septembra 2008.;**
- **Izveštaj s regionalnog parlamentarnog sastanka „Jačanje institucionalnog okvira parlamentarne saradnje u jugoistočnoj Evropi“, Kišinjev, Moldavija, 30. i 31. oktobar 2008.**

*Komisija je jednoglasno primila k znaju sve izvještaje.*

**Ad. 9. Upoznavanje s dopisom Regulatorne agencije za komunikacije BiH, upućenom Vijeću ministara BiH o preduzimanju mjera za osiguranje nesmetanog razvoja tržišta komunikacija**

Željko Knežević, pomoćnik ministra prometa i komunikacija BiH, potvrdio je da je predmetni dopis dostavljen Vijeću ministara BiH, odnosno Ministarstvu prometa i komunikacija BiH kao nadležnom ministarstvu. On je pripremio odgovor Vijeću Regulatorne agencije za komunikacije ali taj dopis ministar još uvijek nije potpisao. Dalje je dodao da WiMax, o čijem oslobađanju govori RAK u svom dopisu, jeste najjeftiniji širokopolasni spektar ali je ukazao također da postoji i drugi spektar kojim se može osigurati širokopolasni pristup korisnicima, od 2,5 do 2,69GHz koji je trenutno slobodan i mogao bi odmah biti ponuđen na tržištu.

Rudo Vidović istakao je da se RAK uklanja od onoga što je u njegovoj nadležnosti. Vijeće ministara BiH i RAK su, prema Zakonu o komunikacijama, pozvani da reguliraju frekventni spektar u BiH, koji je neuređen. Zbog te neuređenosti se i pojavljuje problem korištenja dijela frekventnog spektra od strane RTV sistema, koji je već davno trebalo da bude oslobođen zbog deregulacije i liberalizacije tržišta. Ovdje RAK mora biti nadležan jer je on kao nezavisna institucija upravo zadužen da stvara poštene uslove za sve učesnike na tržištu telekomunikacija. Na kraju je dodao da Vijeće ministara BiH i Regulatorna agencija za komunikacije BiH moraju riješiti ovu situaciju.

*Nakon toga, Komisija je jednoglasno primila k znanju dopis Regulatorne agencije za komunikacije BiH, upućen Vijeću ministara BiH, o preduzimanju mjera za osiguranje nesmetanog razvoja tržišta komunikacija, uz konstataciju da je predmetna problematika u nadležnosti Vijeća ministara BiH i Regulatorne agencije za komunikacije BiH, te izrazila nadu da će ovo pitanje biti pravovremeno riješeno i u skladu sa zakonom.*

#### **Ad. 10. Tekuća pitanja**

- **Dogovor o održavanju sjednice Komisije na kojoj će biti razmatrana aktuelna situacija u BHRT-u.**

Predsjedavajuća Čolo podsjetila je da je u raspravi o dnevnom redu 19. sjednice Komisije odlučeno da se razmatranje dopisa Radio-televizije BiH o aktuelnoj situaciji u toj kući skine s dnevnog reda, uz obrazloženje da je potrebno da se rasprava o aktuelnoj situaciji u BHRT-u treba voditi i na osnovu drugih dokumenata koji su dostavljeni PSBiH, tj. da je potrebno da se kompletiraju svi materijali o stanju u RTVBiH pa da se tek onda o tome raspravlja na sjednici Komisije. U vezi s tim istakla je da je potrebno jasno definirati tačku dnevnog reda, odlučiti da li o toj tački raspravljati posebno, tj. na sjednici na kojoj bi to bila jedina tačka dnevnog reda, koga sve pozvati na tu sjednicu itd. *Nakon obavljene rasprave, Komisija je jednoglasno odlučila da se:*

- *tačka dnevnog reda definiira kao: Razmatranje aktuelne situacije u BHRT-u;*
- *tačka ne razmatra posebno nego u okviru dnevnog reda sa svim drugim tačkama za koje se do održavanja sjednice steknu uslovi za razmatranje;*
- *u vezi s ovom tačkom na sjednicu ne poziva niko od predstavnika BHRT-a ni drugih institucija;*
- *na sjednici razmatraju svi materijali koji su dostavljeni PSBiH u vezi s posljednjim zbivanjima u BHRT-u (od odluke Upravnog odbora BHRT-a o smjeni generalnog direktora).*

Sjednica Komisije završena je u 14,15 sati.

Sekretar Komisije  
za vanjsku i trgovinsku politiku,  
carine, saobraćaj i komunikacije  
Nenad Pandurević

Predsjedavajuća Komisije  
za vanjsku i trgovinsku politiku,  
carine, saobraćaj i komunikacije  
Alma Čolo